

Buna sira! Buna sira me cari siuri! E ben c' me cla vâ?

A suma turna chi, vighi nent vighi, a l'è turnà Nadal.

U smeia ieri cha bitavu i noster plisòn an tla naftalina e adès a suma turna chi a dei in gir a sta "Divota Cumedìa", cun in ani an pù an su reinòn. Ma ev vist che rasa d' in salon cu ma pruntà el Padre Alessandro? La dacc el bionc dapertüt, la fen bità la smoquet taca al miraij, la face vernisè tüt el cadregghi, cuccëina la fin ancora da suè, ste atent vuiater, setev ammac an s'culi süci! A l'è in salon da gala, in salon da ciurèn; per istani av'uma lasè antrè acsei; el prosim ani, siv buti nent el visòn, la vesta con la coua, i' omi cun el farfalèn, i stei tücc ad fora.

Voi i pensavi che dop a 50 ani a la piantëisu lei ad di del buricadi. Eh! La me cara gent, voi iv stufi nent d'avni a senti, e noi um smeia monc veira ad pudei fè i stüpid an süma dis palc. Per noi pover uataròn cme ca suma, avni chin' süma, um smeia d'esi a Hollivood cme Marlon Brando. A la piantuma nent lei, anche perchè el robì che noi a diuma acsei a la boina, an dialèt, u mi'à mustraj sa 2000 ani fà u Siur Messia, e a l'a ciamà tücc, pover r rich, gent feina e gent tajaia cun el purò, cun la tesera e senza la tesera a repetij semper e dapertüt a tücc i' omi ad boina vountà. I son paroli ad buntà e d'amur chi von semper bén; a lè ammä che noi omi a iuma la testa gnicca, auruma nént capila, a l'è per sulei che el robì an tel mond i von acsi ben!
El mond u smeia dventà in caudron ch'el bui, in caudron che da in mument a l'ater a l'aba da stravachè.

Ist'ani a i'uma nént avì l'autunno caldo, caldo no ma a la coque u l'è. Tüt sta gent bitaia an casa integrasiòn, industrial chi saru agl'asiendi perchè ij la fon pù andè avonti, sti pover padron is trovu da 'n mument a l'ater an s'na stra, senza mutua, senza pù na lira; 7 o 8 industrial tucc i d'i a mesdi i venu a piè l'amnestra chi dai Frà.

A csi ciula, anveci ad fè l'industrial, cun el pusibilità chi'avu, i pudivu stüdiè da deputato; isi an casa integrasion i von nent sicür, la Camera e u Senato i saru ammac per andè an ferij o pr'el festi, e l'è nent che ad festi i na fasu pochi.

Si riuscivu nent a dventè deputato, per mal cla füsà andacia in post da commesso della camera il trovavu, in milion al meis ui la gavava pù ansòn.

Noi ai criticuma - però ist'ani j'on travaia, ad leg i non tirà fora in mügg, i'on travaia propi cme del bestij! I m'on dacc u "nuovo diritto di famiglia": adès u iè l'uguaglianza fra mari e muiè, a l'è finì u temp ch'el braji uì purtava ammac el mari, adès el braji i portu tücc, pari, mari, fij e fiò. A l'è finì u temp ch'el cmandava ammac el mari, ades i cmandu tücc.

El pò capitè che se in pari el vo fè n'uservasion, us ciapa dla ciula da so fiò ca l'è in piasì.

I ston per demi la legge sull'aborto, e i mon sa dacc cula an su divorsiu. U smeia nént ma cun tüt is legg la famiglia italiana u s'è rinfursaia, a l'è dventaia pü moderna; me um smeia cla seja dventaia na gabia da cunì. I sei ben cme ca fuma noi an campagna cun i cunì: quondi che in cunì el ven vegg, quondi cu rüsia, us ciapa per i'urgion, us bita ant'natra gabia, cul d'latra gabia us bita da chì, fin tont che forsa ad cambiè, bita da chì, bita da là, us capis pü nent du tüt, chi cl'è el fiò, chi el pari, chi la mari; e noi a suma piasà medesim, a l'è dventà in gran ris e fasò.

I'on anche dacc al vut ai diciottenni, a s'età lei i son pèn d'vita, giuvu cme chi son, i son partì decis, agl'elezion del 15 Giugn, i'on dacc in culp, cu iè manca in fil ch'ianverseisu el caudron.

An capis nent perchè i'abu decis ammac ades ad lasem vighi la television a colori; a l'è da quondi chi'on cmensà 20 ani fa, che ad stupidag-gini ad tücc i culur i m'na fon vighi, us vig che cui chi cmondu i s'na son antaià ammachi adès.

Però del groini i nan aviji, ammac cuc meis fa u j'è scupià la guera del vén fra noi e la Fronsà. L'è finì tüt an t'in gran fiasc, però a suma avni a savei che u noster vén u surtiva da la porta dricia, per rientrè po turna, molto pü car però, da la porta ad snistra; l'era semper u noster vén però us ciamava "Campagne". Pensè che si ciamavu Mafè, u stava uari a fè fora is 2 o 3 brenti an pü.

Chi a Lisondria, a cà nostra, el robi i son semper cme prüma. U siur Borgoglio, u noster sendic, per poua ad perdi el cadrighèn, u se facc ambulunè an sla cadrega.

L'isula pedonale la va cl'è in piasì, u iè aumentà ammac i filobus e tücc ij fon pasè d'an curs Ruma, propi la strà destinaia al passeggio, la strà cla duviva vnì pü tranquila; pruvè a spasiè an curs Ruma, l'è facilisim ch'iv trovi stampà contra na vedreina, gnacà cme na cutlèta panaia. E per pudei spasiè dabon tranquil, absogna andè con in burcèn an süma d'Tani.

Anche u teater an ti giardèn a l'è semper al medesim punto, el va pù ne sù ne zù; i vigarrei che fra 20 o 30 anì aj bütarruma i pè andrenta.

Adès u i'è avni ad moda la massa, l'agitasion culetiva, se jèn el fa u so travai tranquil, senza agitesi, senza criè, el cõnta pù gnente, a l'è na ciula qualunque, adès el cõnta fè tant burdel.

I vighi ben a Ruma: milion e milion ad persoini chi von per l'anno santo, a preghè an sla tomba ad cul cl'è stacc el prim Rappresentont du Siur Messia, ansòn us n'antaia, i giurnal e la radio i na parlu monc pù; adès us vig ammac di cortei ad gent cl'a prutesta, chi cu la vo cocia chi cu la vo crüia, ansòn però a l'è dispost a fè el pù cit sacrifici per in ater; propi tüt el cuntrari d'cul cl'è amni a mustremi u siur Messia.

I vighi! Anche mei a son propi medesim a i'ater, a son ammac bon a criè e ciaciare; am smentiava sa ad ringrasiè tüc sti bravi Frà, che im suportu cun tonta pasiensa; in ringrasiament ai Superiur e in ringrasiament propi particular a Padre Alessandro noster Asistént per tücc i sacrifici ch'el fa per noi, per la nostra Asuciasion e per tüt el ben ch'el fa dapertüt.

Ades a piont lei, perchè se no el va a finì che av fas na predica, e per senti na predica i'andavi an Cesa, i v'la favu pù bela e i pagavi propi nent du tüt.

Av present la me Famija...